

Umhverfis- og auðlindaráðuneytið  
Skuggasundi 1  
101 Reykjavík

Reykjavík, 21. janúar 2021

SENT Á SAMRÁÐSGÁTT

**Efni: Umsögn um drög að hollustuháttareglugerð**

Félag atvinnurekenda (FA) vísar til draga að nýrri hollustuháttareglugerð, sem birt voru í samráðsgátt stjórnvalda 4. janúar síðastliðinn.

Í greinargerð Umhverfisstofnunar með drögunum kemur fram að leitast hafi verið við að endurskipuleggja, einfalda og skýra ákvæði reglugerðarinnar. FA fagnar þeirri viðleitni, sem er til samræmis við áherzlur stjórnvalda um einföldun á regluverki atvinnulífsins.

Félagið gerir hins vegar alvarlegar athugasemdir við þau nýmæli sem fram koma í tveimur síðustu málsgreinum 18. greinar draganna. Þar er annars vegar kveðið á um að t.d. í verzlunarmiðstöðvum, veitingastöðum og öðru húsnæði sem almenningur hefur aðgang að og þar sem fólk safnast saman skuli vera aðgengi að einnota tíðavörum. Hins vegar er kveðið á um að þar sem salerni kvenna og karla séu aðskilin, skuli einnig vera til staðar einstaklingssalerni fyrir önnur kyn.

Hér er um að ræða íþyngjandi kvaðir á rekstraraðila, sem geta haft verulegan kostnað í för með sér, annars vegar vegna innkaupa á vörum sem væntanlega er gert ráð fyrir að gestir í húsnæðinu hafi ókeypis afnot af, og hins vegar vegna breytinga á húsnæði sem geta reynzt mjög dýrar og flóknar í framkvæmd. Fyrir slíkum íþyngjandi kvöðum verður að mati FA að vera skýr lagastoð, en hún finnst ekki.

Vikið er að breytingum á hollustuháttareglugerðinni í 10. lið framkvæmdaáætlunar um málefni hinsegin fólks, sem forsætisráðuneytið birti í samráðsgátt 18. janúar. Í framkvæmdaáætluninni er tilgreindur kostnaður við hina ýmsu liði hennar. Í athugasemdum við 10. lið, „breytingar á reglugerðum um hollustuhætti“ segir hins vegar: „Rúmast innan fjárheimilda.“ Það er að mati FA augljóslega villandi framsetning. Þótt ríkið hafi mögulega ekki hugsað sér að leggja til fé vegna þeirra kvaða, sem lagðar væru á rekstraraðila ef reglugerðardrögin tækju gildi óbreytt, er augljóst að verulegum kostnaði er velt yfir á fyrirtækin í landinu. Að mati FA er það algjörlega óviðunandi.

Félagið leggst af framangreindum sökum eindregið gegn því að síðustu tvær málsgreinar 18. greinar draganna standi óbreyttar. Félagið er að sjálfsögðu reiðubúið að funda með ráðuneytinu ef þörf krefur.

Virðingarfyllst,



Ólafur Stephensen  
framkvæmdastjóri FA